

PN aprova projetu-lei kódigo mineiru iha faze jeneralidade



Plenária PN. Imajen Tatoli/Egas Cristovão

DILI, 30 julu 2020 (TATOLI)—Parlamentu Nasionál, ohin (kinta, 30 julu 2020), aprova ona Projetu-Lei Kódigo Mineiru iha faze jeneralidade nune'e bele regula rekursu minerál sira iha rai-laran.

Komisaun D (Ekonomia no Dezenvolvimentu) apresenta plenária kona-ba relatóriu no pareser Projetu-Lei Nú 4/V(1a) Kódigo Mineiru. Hafoin diskusaun, Parlamentu Nasionál aprova ho votu a-favór 54 kontra 0 no abstensaun 0.

“Ho nune'e Projetu-Lei Nú 4/V(1a) Kódigo Mineiru aprova iha plenária Parlamentu Nasionál, debate espesialidade Komisaun D mak sei haree,” Prezidente Parlamentu Nasionál Ein-Ezersísio atuál Vise-Prezidente Parlamentu Nasionál, Deputada Maria Angelina Lopes Sarmiento anuncia liuhosi plenária, kinta ne'e.

Proponente ba Projetu-Lei ne'e mak hanesan Deputada Virgínia Ana Belo, Deputadu Duarte Nunes, Adérito Hugo da Costa, Francisco de Vasconcelos, António Nobre Tilman, Maria Fernanda Lay, Maria Terezinha Viegas, Mariano “Assanami” Sabino, António da Conceição no Maria Angelina.

Konteúdu hosi Projetu-Lei Kódigo Mineiru ne'e regula atividade minerál nian prezisa halo ezersísio hodi respeita inklui atividade rekoñesimentu preliminar, prospeasaun ba oin no peskiza, avaliaasaun, dezenvolvimentu, esplorasun no tratamentu iha área minerál rai-laran nian.

Nune'e mós transporte no komersializasaun minerál hodi haree fila-fali importánsia ba estadu RDTL, liuliu kuandu atende impaktu no fornesimentu ba materia prima sira, esensial ba dezenvolvimentu, kresimentu ekonomiku no prosperiedade nasaun nian.

Projetu-Lei Kódigo Mineiru hamutuk artigu 162 ho kapitulu 20 no anexu 3. Artigu 1 define aprovasaun kódigo mineiru, artigu 2 define política mineira, artigu 3 define objetivu sira kona-ba estratégia setór mineiru nian no ikus liu artigu 162 ne'ebé define dispozisaun tranzitória.

Proponente Projetu-Lei Kódigo Mineiru, Deputada Virgínia Ana Belo, fundamenta katak lei ne'e importante hodi substitui fundu petróleu.

“Razaun tanba saida mak ita konsidera lei ne'e importante tanba ita hakarak kore-aan neineik hosi fundu petróleu, ne'e mak ita-nia objetivu loloos. Kódigo Mineiru ninia kuantia la'ós boot, nia kiik maibé nia ne'e hodi la'o ba tempu naruk, ita bele uza nia iha

tempu naruk, nia la hotu lalais hanesan fundu petróleu,” proponente ne’e fundamentu razaun refere liuhosi plenária, Parlamentu Nasionál, kinta ne’e.

Nia hatutan, objetivu ida tán hosi Kódigu Mineiru tanba fundu petróleu ne’e hanesan rikeza nasionál entaun Komisaun D konsidera katak kódigu mineiru bele sai baze dezvoltamentu iha munisípiu sira.

“Tanba ita bele deteta kada munisípiu nia rikusoin balun hodi bele dezvoltave munisípiu no restu ita bele fahe ba munisípiu seluk”, dehan nia.

Entretantu, proponente Deputadu Adérito Hugo da Costa hateten, Timor-Leste iha nesidade iha lei refere tanba rikusoin minerál barak tebes entaun presiza lei ida hodi halo regulamentasaun.

“Ita haree esperiênsia ema suru rai-henek iha mota Comoro no Liquiçá ho de’it diploma ministeriál no kompañia sira ba suru rai-henek maibé la fó kontribuisaun reseita ba estadu. Tanba ne’e mak tempu to’o ona no ha’u brani deside sai hanesan proponente hodi elabora projetu lei ida-ne’e, nune’e ita tama ona ba seriedade atu jere ho didi’ak rekursu minerál sira maibé tenke iha Lei Kódigu Mineiru (*undang-undang pertambangan*),” nia hateten.

Deputadu Bankada Partidu Demokrátiku, Mariano “Assanami” Sabino, hateten rekursu minerál sira tenke konsentrasaun prinsipál ba estadu Timor-Leste.

“Nu’udar proponente ha’u haree katak estrutura lei ne’e di’ak ona, karik ita aprova depois mak ita ko’alia detallu kada artigu iha laran,” dehan Assanami.

Prezidente Komisaun D (Ekonomia no Dezenvolvimentu), Deputadu Antoninho Bianco, esplika iha aspeitu tolu iha projetu lei ne’ebé diskute faze jeneralidade mak hanesan prinsipiu hosi projetu ne’e la kontra konstituisaun, estrutura mak projetu ne’e ho artigu 6 de’it maibé Kódigu Mineiru ne’e hamutuk artigu 162, ikus liu sistema hosi projetu-lei ne’e la viola konstituisaun.

“Lei Kódigu Mineiru tenke iha se lae rikusoin barak maibé ita la atrai konfiansa hosi ema estranjeiru atu investe iha ita-nia rain,” Prezidente Komisaun D ne’e fundamenta.

Jornalista : Evaristo Soares Martins

Editór : Cancio Ximenes